

# TIAGO

## Tiago Kata Inweniby

*Xirâ kata wâgâ inwenily Tiago nhangahu odaji iemâmy Deus. Awylygue Deus itaumbryrlâ xirâ Tiago inweniby. Maria imery myakâwândy Tiago; awylygue myakâwândy Jesus iukonoem awyly ise eynynâ.*

*Deus, xirâ inwenien-honly myakâwândy, Jesus einwânni modo âdara adâidyly awyly nhutihomoem. Xirâ kata wâgâ tutuze kurâ, âzekiba lelâ idânârâ kiendyly awyly, âdypeom, âdypebaom alelâ. Jesus einwânni modo âtâdygyuhodâ tydinherugueim modo lelâ koendâ tâdaenkuzeim, tydinheruguenry modo pylâ koendâ tâdaenkuzeba-ro waypa kelype.*

*Koendonro aguyjiene, Jesus tâinwânse lelâlâ kydawyly kienehon-hoem, kely tytainze kurâ xirâ kata wâgâ. Âkelomo kienmawyadâbyra kurâ, kienagazedlyly warâ-ro watay, kykewâdyly kulâ, “Jesus tâinwânse urâ” kykely. Aguykeho tymânâzelâ kine, âdalâ kulâ aguykeba kitoem. Peto xigâlegueam poji nhawâdyly watay, imeâgâemba kehoem tugueze, myara lâpylâ kytanru iwyku inakanhe kyedyly.*

*Âdypeom turâem tâwanuneim modo nenokubryra nidâ. Koendâ lelâ nepywadâmo. Jesus einwânni Deus izepa ato anhedlyly watay, eagonro modo nurudâ, âdalâ kulâ adâidyly imohomoem, Deus lelâ nheinwântomoem warâ.*

### Aguely adaguhu

**1** <sup>1</sup>Urâ Tiago xirâ iweninri. Deus, Kywymâry Jesus Cristo warâ emary urâ. Idânârâ Deus eynnonro modo kêndaenkuly tâinkonro modo lelâba.

### Tâsenagazedlyly tâmaenze Jesus eynnonro modo

<sup>2</sup>Cristo eynynâ ypemugudo, mâsenagazedlylymo watay, tâjityenzeba itaungâ, tuomare lelâ itaungâ. <sup>3</sup>Tutuzelâ âmaemo, mâsenagazedlylymo umelâ, Jesus einwândyly mâinmoba mawylylymo. Awârâ wâgâ enehorimbyryem âmaemo, mâkâ einwânsezelâ mawylylymo. <sup>4</sup>Mâsenagazedlylymo umelâ, Jesus mâinwândylymo mâinmoba âmaemo

watay, Deus ize ato aralâ âmaemo. Ize ato lelâ amânhekylymo. Koendâ kehoem ize ato aiedyly xutuimbyryem âmaemo. Ton-honreba mitaymba ise âmaemo, mâinwândylymogue. Izepa ato kulâ amânhetaymba ise âmaemo. <sup>5</sup>Âda midylymo mâuntuba âmaemo watay, Deusram ekadaungâ. Kienkaduo, âdiempa kulâ xudunri mâkeba mâkâ; kienkadobyry wâgâ kagâ tyewiâtuneba ise mâkâ. <sup>6</sup>Deusram kienkaduo olâ, kienkadyby nhuduly kyzeinwâne lelâlâ. “Xuduze keanra” kykeba kine. Kieinwândyly, kieinwâmpyra kidyly watay, parutabâ sahugânu ara kulâ kurâ, sapezenruam wayam, wayam âiehoim ara kurâ, Deus lelâ kieinwâmpyra kydawylygue. <sup>7-8</sup>Iwerâ tâinwânse,

kopaêlâgâem neinwâmpyra waunlo; âdy nhekadyby nâduduowâpyra ise.

### Âdypeom, âdypebaom warâ

<sup>9</sup>Âmaemo âdypebaom Jesus einwânni modo, tuomare lelâ itaungâ, Deus xurâem kurâdo tynrenseim âmaemo. <sup>10</sup>Alâ pylâ âmaemo âdypeom modo, Deus tâlâ matomo nhainly-ro watay, tuomare lelâ itaungâ, Jesus tâinwânse mawylmogue. Igueze âmaemo, nady sawanku adakâdybyem âdiempa kulâ ehogu, inepa iguely myara. <sup>11</sup>Xixi ton-honre kehoem watay, âdâpigu nady tyaduânse. Sawanku tâihuguewâze, tywâkureba tâise-ro warâ. Arâ lâpylâ âdypeom modo iguely, tâlâ tato modo imâem tientoem tâsewanily umelâ.

### Deus mâkeba inakanhe aguitoem aienehoim

<sup>12</sup>Kurâ Jesus einwândyly kinmibalâ kydâsenagazedly emâenrimbyry kuomazeânze Deus. Arâ kienmaenzedyly-ro watay, aunloenlâ kyigüepa kitoem aiese Deus, tâgaseim waunroem saintyby tâgatobyry ebyry nhemakeho ara. Awârâ mawânkâ adienkylyem aguehobyry tywyneni modoem. <sup>13</sup>Inakanhe aguidyse lelâ kurâ-ro watay, “Deuslâ ‘Inakai aiekâ’ keim” kykeba kine. Ânguy Deus inakai anhetoem aienehonrim lâpeba; inakai modo aguietoem aguewâpyra lâpylâ mâkâ warâ. <sup>14</sup>Deus xurâ mâkeba awârâ inakanhe adâjidyly. Kurâlâ mawânâ Deus aguehobyry kiankadoem inakanhe aguidyseudonro. Atâ wâgâ eturu tientuo mawânkâ kanra âsenogudyly, iwogonro sawâse idâly; nhawâtu, adaweoly; arâ lâpylâ mawânâ tâwâlâ kulâ kydâsenogudyly, Deus izepa ato aguiendyse kydawylguelâ. <sup>15</sup>Inakanhe aguidyse kydatogue kydâpaunzeduo mawânâ inakanhe

aguidyly; Deus aguehobyry kiankadyly. Itaumbyry kiankaduo, kyigüelylâ, aunloenlâ eagâpa kidyly-ro warâ.

<sup>16</sup>Cristo eynynâ ypemugudo, tâsenoguzeba itaungâ. “Mârâ inakai agânhedyly, Deuslâ mawânkâ agânhetoem agueim” tâkezeba itaungâ. <sup>17</sup>Idânârâ koendonro modo, iwâkuru modo warâ kienmakely Deus kaynonrodâlâ âewyly; xixi, nunâ, ximukâ warâ tytanrugue kulâ xugunipyry nhuduly. Xixi, nunâ, ximukâ warâ tâjidydâpa tâtugugueze. Âtugugueduo tyamase. Deus olâ nâtugugueba; aunlolâ kagâ awyly, kurâem koendonro modo aiese, <sup>18</sup>Tâwâlâ ize tawylyguelâ kyazeântondyly, itaumbyry kieinwântoem. Etâdyby ewily waunroem ekaunâdyby wâne eyam xuduly, myara lâpylâ waunroem kydawylly, idânârâ nhugutyby modo enday.

### Deus aguehobyry ara aguine, kindadyly kulâ warâ inkâba

<sup>19</sup>Xirâ enanâgüewâdaungâ, Cristo eynynâ ypemugudo kâinwynegylyly modo. On-hondybyem lelâ itaungâ idase. Inepa kehoem âdy kâjihoguwâdaundâ; koendâ wao amyguehomo xutuwwâdaungâ; inepa tyewiâpazeba itaungâ warâ. <sup>20</sup>Kyewiâpaduo mawânâ Deus izepa ato ara kulâ aguidyly, aguykely warâ. <sup>21</sup>Idânârâ inakanhe tadawyly imowâdaungâ. Eagâ mohogüin-homobyry keba kulâ kâdynanâdaundâ. Nady âpa ezay etâdyby wâne tyazeze, ago tâise, tâwiseze warâ myara awârâ Deus itaumbyry, kieinwântuo kydâsemaguehoem idyly. Deus aguehobyry kyangahu odaylâ watay, ize ato adyese kurâ. Koendâ lelâ itaungâ, aguehobyry ara lelâ amitomoem.

<sup>22</sup>Tâsenoguzeba itaungâ. Idadyly kulâ warâ inkâba Deus itaumbyry; aiedyly koendonro kuru. <sup>23</sup>Takaday espelhu

oday tahule kulâ âzeni ara awâkâ kurâ Deus aguely indadyly kulelâ, agueho ara anipyra waunlo. <sup>24</sup>Âzedyly. Idâly. Inepa âdara tawyly nhenanânehonly. <sup>25</sup>Koendâ kehoem unâ iwâkuru tâdâsemaguehoem Deus aguehobyry aguidyly-ro watay, arâ ise âdaunloenlâ kydâzewentâoba kydawyly Deusram. Deus inwenien-hoymby kienanânehomba aguiensezedyly lelâ warâ watay, idânârâ aguienkyly modo koendâ ese Deus.

<sup>26</sup>Jesus einwânniem lelâlâ kydâdutuly, aguykeho kinmanâbyra olâ kurâ warâ watay, âwâlâ kulâ kydâsenogudyly. Deus xurâem aguienkyly âdyem nitaymba, Deus niomazeândaymba awârâ. <sup>27</sup>Jesus tâinwânse kydawyly kienehondyze Kunwym Deus, todonenry modo, pypâ modo warâ kienmawiyadâdylygue, mâkâ izepa ato aguiempyra kydawylygue warâ. Arâ mawânâ xurâem tywykeba kydawyly.

**Âzekiba koendâ kydawyly  
nidâ âdypeom agâ,  
âdypebaom agâ alelâ**

**2** <sup>1</sup>Cristo eynynâ ypemugudo, Kywymâry Jesus Cristo, Kunwym Deus iwâkuru enehoim, einwânni warâ âmaemo. Awylygue âzekiba kurâ domodo sawiwâtaungâ, âdypeom, âdypebaom alelâ, mâkâ lelâ manwilymo, mâkâ mawipamo waypa. <sup>2</sup>Deus ehogeeze âtâdygybyem matomoam azagâ uguondo egawândyly, tokalâ tydinherugueim, tâtygoengue kehoem, ane ouruguetobe warâ, eagonro olâ âdy odo keba, ety adaugueypyem, tywyke kehoem warâ. <sup>3</sup>Tâtygoengueim lelâ mawilymo, âji iwâkurudâ mâenkanâguylymo. Âdy pebaonram, “XYDYK warâlâ ikâ” myguelymo. “Onwâgâlâ ikagâ ypebaylâ” myguelymo. <sup>4</sup>Arâ amituomo, ânguy âzekiba mâempyra mawylmolâ awârâ. Âdypeom manwi-

lymo, toenzepa idinherugue kulâ, âdypebaom pylâ mawipa âmaemo-ro. Koendonro mâkeba awârâ arâ adâjidyly!

<sup>5</sup>Idataungâ, Cristo eynynâ ypemugudo kâinwynegylyly modo. Xirâ onro anaym âdy pebaom modo Deus induakely, toenzepa tâinwântoem. Tâlâ ise akaemo târâ Deus pymâem atodâ, Deus “Ywyneni modoam xuduze urâ” kehobyry. <sup>6</sup>Âdypebaom modo Deus induakeyby izepa olâ âmaemo! Âdypebaom modo mâkeba inagazenimo! Âdypeom modolâ pymâ modoram igamenrimo, mâzewentâohomoem. <sup>7</sup>Jesus Cristo eynynonro âmaemo. Âdypeom modo olâ mâkâ ezedy wâgâ inakanhe kulâ aguenri.

<sup>8</sup>Iwenibyem Deus itaumbry awo wâgâ: “Agonromo agâ âpynedaungâ; koendâ mâzetomo ara, arâ lâpylâ agonromo agâ koendâ âzetaungâ.” Xirâ tâzezewenry Pymâ Deus aguehobyry adyese âmaemo watay, mâkâ aguiendyse atolâ amânhekylymo. <sup>9</sup>Âdypeom modo lelâ ize matomo, âdypebaom modo pylâ izepa âmaemo-ro watay olâ, Deus aguiendyse ato araba amidilymo. Inakanhe kulâ amidilymogue, Deus iwentâzemo. <sup>10</sup>Ize tato lelâ Deus aguiendyse ato. Deus aguiendyse ato iweniwânmy Moisés.

Tokalâ Deus aguehobyry sakani-byry-ro watay, idânârâ nhakadylylâ mârâ. Mâkâlâ ise tâwentâguezeim, idânârâ Deus aguehobyry aniempyra awylygue. <sup>11</sup>“Eagâ mohogüin-homobyry keba kulâ kâdynanâdaundâ. Ânguy kâdyâwâtaundâ” kewândymy Deus. Âdykâ âkelo agâ mipyra lelâlâ wâne âmaemo, âguedy xyâim-pyry âmaemo-ro watay olâ, Deus iwentâzemo, idânârâ aguiendyse ato mâinwâmpyra matomobyry wâgâ. <sup>12</sup>Deusram emakeybyem mawylmogue, ize ato ara lelâ aitaungâ, aguwâtaungâ

warâ. Xypyry etay koendonro âyanmo xuduze mâkâ, “Koendonro aiekâ” kehobyry aienibyryem âmaemo-ro watay. Amânhepyramo-ro watay olâ ise koendonro nudupa âyanmo. <sup>13</sup>Ânguy kintyembyra kurâ-ro watay, Deus kityendaymba lâpylâ ise xypyry etay, âdara kydawyly wâgâ adâkeday. Âkelo ityeni kurâ watay olâ, Deus kityenze lâpylâ.

**Jesus eynynonro lelâlâ kurâ watay, kaikânro modo kyzemawypadâne**

<sup>14</sup>“Jesus einwânni urâ” myguelymo, âkelomo xurâem koendâ amipyra âmaemo warâ watay olâ myguelymo kulâ, Cristo eynynâ ypemugudo. Amygueduomo kulâ Deus imakewâbyramo ise. <sup>15-16</sup>Tâwâlâ wâne Jesus einwânni âdypebaom modoram, “Tâseguâdâzeba itaungâ. Deus âpyniryimo, itymo owogonromo warâ xuduze” myguelymo; mâwampyramo, mâentydâbyramo warâ watay olâ ise amyguehomobyry âdyem nipyra. Tâlâ âmaemo tuduzeim, pyni, âtâ tyeseim warâ watay, âunduwâtaungâ. <sup>17</sup>“Jesus tâinwânse urâ” kykely, ânguy kienmawypadâbyra kulâ-ro watay, kienwânto âdyem nitaymba, igueypy ara kulâ.

<sup>18</sup>Tâlâ wakeim modo: “Koendonro agânhepyra wâne urâ. Cristo kâinwândylygue olâ ise kâsemaguely” keimpe âmaemo ewy. Tâlâ pylâ olâ, “Urâ olâ, kâsemaguely ise koendonro agânhe-dylygue, Jesus kâinwâmpyra wawyly umelâ” keim modo. Eyanmo wauguely olâ: “Nuduwâpyra Jesus kienwântoem, koendonro aguiempyra kulâ. Koendonro aguienkyly wâgâma Jesus tâinwânse lelâlâ kydawyly kienehonly” uguely. <sup>19</sup>Tutuzelâ âmaemo Deuspe awyly. Âkealâ awârâ. Awârâ mâuntulymogue kulâba olâ ise mâze-makeolymo. Kadopâ inakai modo

mawânkâ Deuspe awyly tutuzemo lâpylâ, tytazemo-ro warâ. <sup>20</sup>Tuândy awâkâ, “Jesus tâinwânse urâ, âdy koendonro agânhepyra olâ urâ âkelomo xurâem” keim. Koendonro aguienkyly wâgâma Jesus tâinwânse kydawyly kienehonly.

<sup>21</sup>Enanâguewâdaungâ Deus aguehobyry kydamu Abraôoram, Abraão tâinwântâ lelâlâ awyly tientoem: “Âmery Isaque xyâgâ, ânguydo imeom yam mâengamehoem mâyân-ho ara” kewândymy. Aituo Abraão tuhu angatoam ietyby onwa Isaque nhadyly, nheguetunâdyly. Nhâly ume kehoem myakâwândy: “Akâiedâ! ‘Aiekâ’ uguehobyry amânhetoem on-hondybyem mawyly xutuaguilâ” kely Deus Abraôoram. <sup>22</sup>Deus “Aiekâ” kehobyry ara kehoem myakâwândy Abraão aidyly, Deus tâinwânse lelâlâ tawyly tienehon-hoem, adienkyly modo wâgâ. <sup>23</sup>Deus itaumbry awo wâgâ iwenibyem: “Deus aguely Abraôoram: ‘Pymâ Deus tâinwânse lelâlâ âmâ. Awylygue âdy iwentâdo lâpeba âmâ’ kely.” Aituo myakâwândy Abraão “Deus eataen-ho” kehonly. <sup>24</sup>Arâma kienwândyly kienehonly, “Aiekâ” kehobyry aguiendylygue. Arâpa watay, kienwândyly âdyem nitaymba, Deus xurâem tâwentâguezenry keba kurâ-ro warâ.

<sup>25</sup>Enanâguewâdaungâ pekodo MON waunlo Raabe, azagâ uguondo israelita nhoentobyry. Sodadu israelita domodo iray igonotyby myakâwândy akaemo azagâ, xidadâ enuagaenze. Deus wâgâ unâ tindatyby tâinwânse tawylygue myakâwândy Raabe akaemo azagâ uguondo tâty oday soense tyanepa awyly. Ilâpyryem âsemaguehomoem eagonro ânwa oze indâwantâdylymo. Adienkyly wâgâlâ tâinwânse tawyly nhenehonduo, ewentâdo lâpeba Deus xurâem.

<sup>26</sup>Kâgadopyry âzetyly-ro watay, iguey-pyem kurâ. Arâ lâpylâ, Deus aguiendyse ato aguiempyra kurâ-ro watay, “Jesus einwânni urâ” kykeho, âdyem nipyra awyly. Igueypy ara kulâ Deus kâendyly.

**Kulugue inakanhe  
aguykeho kaindâ lâpylâ**

**3** <sup>1</sup>Âmaemo ewy aguipalâ tâise Jesus eynynonro modo âtdygyhodâ enomedâniem ini, Cristo eynynâ ypemugudo. Xina Deus wâgâ enomedâni modo ise, âdalâ kulâ xina aidyly-ro watay, âsenomedâni modo takaze kehoem tâwentâguezeim, tutuzelâ âmaemo. <sup>2</sup>Idânârâ kurâdo Deus izepa ato adyese lelâ. Âdykâ lâgâlâ ânguy Deus izepa ato aniempyra nipyra. Mâkâ âdalâ kulâ aguedânry, Deus ize ato ara isezedyly lakuru. Adâkeho modo, adienkyly modo, tyangahu oday tunâry modo warâ tymanâze mawânkâ.

<sup>3</sup>Kawaru itano tyese kurâ, ize kydato ara aguientoem. Mârâgue kulâ mâkâ kiempagunâdyly, kiangâikely warâ. <sup>4</sup>Etaungâ pepi imâsedo; sapezenu ton-honreim mârâ igononi, leme imeimbyry kulâ olâ sani sagâikeim warâ. <sup>5</sup>Alâpylâ kulu, imeimbyry kulâ wâne, sawoem kitoem, imâsedoem kehoem kydadutuhoem warâ adyese olâ. Etaungâ! Peto imeimbyry wâne, poji imeâgâemba tugueze olâ! <sup>6</sup>Kulugue inakanhe aguykeho kaindâ lâpylâ, peto ara kehoem. Idânârâ unâ inakai adâkeze kurâ. Inakanhe aguykeho idânârâ kodo inakanhe nhedyly, tâzewânu inakai kodo nhahuly wâneam myara. Peto poji anaym adapegyly-ro watay, idânârâ tyaduânse, myara lâpylâ kunâry iwyku MON idyly, idânârâ kodo nhahuly, kyigueho odaji kehoem. Âdykâka awârâ âewyly? Infernudâ, Satanás ejidydâ.

<sup>7</sup>Idânârâ ânguydo imeom tahozeânze kurâ, tawâguneim modo, idu odano



(Tiago 3.3)

modo, ârahujini modo, paikano modo warâ. Kianwâdyly watay, tâwâlâ ize kydato ara aguiendyly. <sup>8</sup>Ânguy olâ tulu nimanâbyra, inakanhe adâkeba tâitoem. Âgâu kâtobry ewânedyly, ara lâpylâ inakanhe aguykeduo ewânedyly, kyâdâ-ro warâ. Ânguy tulugue inakanhe adâkeho aguepa tâitoem aguepa nitaymba. <sup>9</sup>Kytanrugue Kywymâry, Kunwym Deus koendâ awyly wâgâ adâkeze kurâ. Mâkâam aguykehoguelâ lâpylâ olâ âkelomo kiunâguedyly Deus tara nhugutyby modo. <sup>10</sup>Kytaybalâ unâ Deus koendonroem awyly wâgâ aguely egasely, mârâ oze lâpylâ olâ kurâ domodo wâgâ inakanhe aguykely egasely. Arâ aguykeba kine, Cristo eynynâ ypemugudo. <sup>11</sup>Paru tânyzeim, paru tânyzenry warâ âzetay lelâ inkâba iazely! <sup>12</sup>Cristo eynynâ ypemugudo, figu lelâ figueira ewily, azeitonague pylâ ewitu nitaymba. Uva lelâ uva edy wogonro, uva, figu warâ inkâba. Paru tânyzenry egasehodâ, paru tânyzeim negasewâbyra. Awylygue kytarygue koendonro wâgâ lelâ aguykenre, inakai modo wâgâ lâpylâ waypa.

**Azagâ tâzenomery wâgâ  
agueho, Deus nhuduypy,  
Diabu nhuduypy warâ**

<sup>13</sup>Âduaymo tâlâ âdy iozeno, âdy iozepaom warâ awyly xutuim watay, koendâ adâidylyguelâ awârâ

nenehomo. Koendâ adâidylygue, sawoem nipyra tiuntuyby anien-dâmo. <sup>14</sup>Angahumo oday agonromo wâgâ mâsewânilymo, âdalâ kulâ amyguelymo, amidylymo warâ watay, “Tonomegueim urâ” tâkezeba itaungâ; mygüewâdylymo kulâ awârâ. <sup>15-16</sup>Deus konomery nhuduypy mâkeba awârâ. Xirâ onro anano kulâ awârâ. Tâzenomery inakai Diabudâpa âewyly, adyese kurâ-ro warâ, kyangahu odaylâ mawânâra âtugudyly. Âdykâlâ âkelomo isejiguy wâgâ âsewânirimbe, âkelomo takaze âdutuimbe warâ watay, tâdâ-tuebadylybe, inakai modobe warâ.

<sup>17</sup>Konomery Deusdâba âenibe kurâ-ro watay olâ aguidyly, âdygue kâwentânehomba. Ânguy kieumpyra kurâ; kintoguyba kurâ. Koendâ lelâ ize kydawyly. Idânârâ agâ kataen-honu. Toenzepa kinwynedyly lelâ. Koendonro modo aguienkylygue âdaunlo modolâ kienmawyadâguyly. Aguykehogue, aguienkylygue warâ ânguy kienokubyra kurâ warâ. <sup>18</sup>Deus xurâem koendonro tâdâseguelyby, tâjidueku warâ epagunâni modo ewanopyry, ewy etâdyby wâne, ewilyem tâzekaunâoze myara.

**Deus ize ato agâ  
âseinwândânry modo**

**4** <sup>1</sup>Âdykâbaka tâdâjiewiâsedyly, tâdâseguelybydze tadawyly warâ âewyly, inanjimo? Deus mâinwândydyse lelâlâ wâne âmaemo, mâkâ aguehobyry takaze lâpylâ olâ âmaemo. Angahumo oday tâdâjitoguylybe-ro waunlo ara. <sup>2</sup>Toenzepa âdydo imeompe midyse mawylymo. Ize matomo manâto peba-ro watay, kurâ tyâze lelâlâ âmaemo, âdype mitomoem. Mâkâ tâlâ atogue toenzepa tâsewânize âmaemo. Awylygue mâintoguydyze mawylymo, ize matomobe mitomoem. Deusram mâenkabyra

mawylymogue olâ, ize matomo peba mawylymo. <sup>3</sup>Deusram tâkaze lelâlâ wâne âmaemo, mâenmakeba olâ âmaemo. Koendâ âunâgumogueba mâenkadylymo awylygue, Deus nudupa awyly. Tâwâlâ omaromoem kulâ mawânâra mâenkadylymo.

<sup>4</sup>Deus aguehobyry mâinwâmpyra mawylymogue, ize ato aiedyly mâinmolylymo, ize matomo amânhetomoem kulâ. Tutuzelâ âmaemo, Deus ize ato agâ âseinwândânry modo ize matomo watay, Deus idueryem midylymolâ awyly. Augueondyly, Deus izepa ato ara kulâ xirâ onro anaym amidylymo watay, Deus idueryem midylymolâ lâpylâ.

<sup>5</sup>Warâ iwenibyem awyly Deus itaumbryry awo wâgâ: “Deus kyispiritury kuodaxi ienipryryem. Awylygue koendonro, koendâpaom alelâ aguiendydyse kydawyly.” <sup>6</sup>Deus koendonroem awyly olâ ton-honreim kuru, inakanhe aguipeya kitoem. Awylygue Deus itaumbryry awo wâgâ warâ iwenibyem awyly: “Tada-loenly kewâni modo ize inkâba Deus; ‘Âdy mâkeba urâ’ kewâni modo tâmawyadâze, eon-honrumo tuduze warâ olâ.”

<sup>7</sup>Deus aguehobyry ara aitaungâ. Diabu, Deus izepa ato âyanmo aienehonze keduo, âdaunloenlâ aguely kâjiwantaguedaundâ. Idatânry ara midylymo lelâ-ro watay, âydâpamo âxigüeze lelâ. <sup>8</sup>Deusram iwaguepa aintaungâ, iwaguepa âyanmo saintoem lâpylâ. Imarymo tywykeba itoem mâzemaunguehomo ara, inakai modo amânhekylymo imowâdaungâ, Deus enanaym koendâ mitomoem, âmaemo Deus izepa ato aieni modo. Inakanhe mâpaunzedomo imowâdaungâ, âmaemo koendâ lelâ amidylymo waunlo emyenro modo. <sup>9</sup>Toenzepa âjityendaungâ, toenzepa kehoem ohogüendaungâ warâ inakai modo amânhetomobyry wâgâ.

Âilumo ogunrumoem ietaungâ, Deus mâinwâmpyra matomobyry mâuntu-duomo. Omarumo âtynrumoem ietaungâ warâ. <sup>10</sup>“Âdy mâkeba urâ” kewâtaungâ Kywymâry Deusram. Arâ ise xurâem, tynrenseinhe mawylymo.

### Ânguy kiunâguebyra kine

<sup>11</sup>Cristo eynynâ ypemugudo, âkelomo kâdunâguedaundâ. Deus ânguy kiunâguebyra kitoem adâkeze. Âdaituoba kulâ âkelomo mâenwentâ-dylymo, mâunâguedylymo warâ watay, Deus aguehobyry mâunâgueguylymo. Deus aguehobyry mâunâgueduomo, Deus takaze mâdutulymo. Âmaemo mawânâ âdy ioze, âdy iozepaom warâ awyly agueim, Deus keba. Arâ-ro watay, Deus einwânniembra tâise âmaemo, Deus xuturin-em ise myguedylymolâ. <sup>12</sup>Deus lelâ warâ “Aitaungâ” keim. Mâkâ lelâ ânguy tâwentâzeim, tâwentâ-zenry warâ awyly xutuim. Mâkâ lelâ ise xypyryem agueim: “Mâkâ modo ise kâenmakely. Mâkâ modo ise ydâpa kânhekely” keim warâ. Awylygue ioze inkâba ânguy kienwentâdyly.

### Kopaelâgâ aini ânguy nutuwâbyra

<sup>13</sup>Idataungâ. Watâkeze âmaemo: “Iwerâ atay, kopaelâgâ atay warâ idâze urâ xidadâram. Tokalâ anu ise târâ wawyly. Âdydo imeom sanâse, vende iese warâ urâ, toenzepa ise ydinherugu” myguelymo. <sup>14</sup>Âdy kopaelâgâ agâmo aini mâuntuba olâ âmaemo, âiguelymo atay, âiguepamo atay warâ. Ikamu emyenro kulâ âmaemo, âewyly, sakadyly waunlo. <sup>15</sup>Awylygue warâ aguewâ-taungâ: “Deus ize-ro watay, auguehobyry aiese urâ” kewâtaungâ. <sup>16</sup>Kopaelâgâem aini tutuze mâdutulymo-ro watay, Deus takaze mâdutulymo awârâ. Inakai kulâ arâ tâdâpaunzedyly. Mâkâ lelâ awârâ

xuturim, âmaemo mâkeba. <sup>17</sup>Mâkâ Deus aguehobyry adyeseinhe tiuntuly umelâ aietânry, Deus aguehobyry nhakadylylâ mâkâ.

### Toenzepa tydinherugueim modo xuruto

**5** <sup>1</sup>Idataungâ, âmaemo toenzepa âdydo imeom sodo modo, Deus einwântânry modo! Ohogüendaungâ, adaenkewâdaungâ warâ wayam mâsenagazedomo wâgâ. <sup>2</sup>Toenzepa tâlâ matomo modo âdyempa itaynly, iwân-zewâdyly, xuhurozewâdyly warâ. Itymo owogonromo tâwânseim tuonroam âdâ-howâdyly. <sup>3</sup>Âdinherurumo, âsejiguymo ourugueto warâ mâenkanâdybymo tohozeleba idylylâ ise xutuen-hoim âdy pebaom modo mârâgue mâen-mawyadâbyra matomobyry. Xypyry etaji kehoem mawânâ âdinherurumo, âsejiguymo warâ idâtyguyimbyryem mawylymo âmaemoem lelâ. Awylygue ise peto nhâtânry amaym mâsenagazedylymo. <sup>4</sup>Âpimo ezay tâwanuneim modo ewanopyry ara mâempywadaymba âmaemo. Kywymâry Deus Ton-honreim olâ tâwanuneim modo saenlumo tydase. <sup>5</sup>Âdy ipa matomo lâpeba âmaemo xirâ onro anaym. Koendâ lelâ kehoem ize mawylymo, âdyam ize matomoam tâtâze lelâ âmaemo warâ. Tapirâ xyâhoem sadyzeândyly wâne myara, adyzedylymo pyni tâkubâgueingue, tâwânseingue warâ, âiguehomo odaji idyly ara. <sup>6</sup>Âdaitânry modo tunâgueze, tâwentâze warâ âmaemo, pymâ modo enanaym, xyâhomoem kulâ. Âdara âsemaguehomo peba-ro warâ, âdypeom keba awylymogue.

### Kydâsenagazedyly kienmaen-hoem kuruto

<sup>7</sup>Cristo eynynâ ypemugudo, idânâry mâsenagazedylymo emâenwâdaungâ,

Kywymâry Jesus odopâdyly ara. Etaungâ. Âpa ezary sodo kopâ waunro ihuguely nhenuendyly tientâdoem. Ilâpyryem sahanâni ihuguely nhenuendyly, tienkaunâdoem. Mârâ pyni nhekaunâgyulyma tywyneim kuru, mârâgue mawânkâ ise ipynigu. <sup>8</sup>Myara lâpylâ Kywymâry Jesus enuenze tynazeza itaungâ. Inepa ise odopâdyly.

<sup>9</sup>Cristo eynynâ ypemugudo, âpemugumo Jesus eynynonro modo kâdunâguedaundâ, Cristo eynynâ ypemugudo, Deus inwentâbyramo itoem. Ohondybyem mawânkâ Jesus. Inepa ise âewyly, tâwentâzeim, tâwentâzenry warâ wâgâ agueze. <sup>10</sup>Jesus mâinwândylymogue mâzenagazeoly mo emaenwâdaungâ, saguhoem Deus itaumbryry aguewâni modo nhemaen-hobyry ara. <sup>11</sup>Akaemo wâgâ koendâ aguykely olâ, tâsenagazedlyly umelâ Deus einwândyly nimoba atomobyry wâgâ. Jó aiehohobyry enanâguewâdaungâ. Toenzepa âsenagazemâmy. Idânârâ tâlâ ato modo adainwânmy: imeombyry, eguydo, isejiguy, ipi ezary modo; toenzepa ewâmamâ lâpylâmy warâ. Deus einwândyly nimoba olâ myakâwândy. Ilâpygueduo olâ, koendâ kehoem myakâwândy Deus eagâ awyly. Idânârâ tâlâ ato adaimpy ejiyano xuduwânmy Deus. Kytendâ lelâlâ Deus, koendâ lelâ kagâ awyly warâ.

<sup>12</sup>Cristo eynynâ ypemugudo, aiese lelâlâ mâdutulylymo watay lelâ, “Aiese urâ” kewâtaungâ. Amânhepyra mâdutuduomo olâ “Agânhepyra ise urâ” kewâtaungâ. “Tâwâlâ ise kau, onro warâ tytanrugue kulâ xugunipyry ienagazenehonly, âkealâba auguely watay!” tâkezeza itaungâ. Arâ Deus ezedy âwankuem mânhedlylymo-ro watay, inwentâzemo, inagazezemo warâ mâkâ. Xirâ mâuntudyzemo wato.

<sup>13</sup>Mâsenagazedlylymo watay, Deus agâ aguewâtaungâ. Omarumo ume, Deus koendonroem awyly wâgâ âgâtaungâ. <sup>14</sup>Iwâmadylylymo watay, Jesus einwâni iwymâry modo igâsedaungâ, Deus agâ aguehomoem, tâwâneim nhangahu onwa azeiti âdiempa nhetomoem warâ. “Kywymâry Jesus aguehobyry ara xirâ âmâem agânhedlyly” kezemo. <sup>15</sup>Deus tâwâneim kua iese awyly tâinwânse kehoem Deusram nhekadylylymo watay, tâwâneim kua iese Deus. Inakanhe aityby mâkâ tâwânein-ro watay, inakanhe aitobyry xygakeze lâpylâ. <sup>16</sup>Deus izepa ato amânhedlylylymo-ro watay, agonromo agâ âkaduwâdaungâ. Deusram ekadaungâ, inakanhe amitomobyry nhygakehoem, kua âetomoem lâpylâ warâ. Deus ize ato lelâ aieni nhekadyby ton-honre lelâlâ, Deus ize ato aienehonze.

<sup>17</sup>Elias enanâguewâdaungâ, Deus eynynâ agueypy. Kâmyenro kulâ lâpylâ myakâwândy mâkâ. Kopâ nihugeba itoem myakâwândy Deusram nhekadyly. Três anu, tuotagueze myakâwândy kopâ nihugeba awyly! <sup>18</sup>Awârâ sakabygueduo myakâwândy, Deus agâ agueondyly; kopâ ihuguehoem nhekadondyly. Toenzepa myakâwândy kopâ ihuguely. Âdydo imeom etâdyby iazely, ago idyly, ekaunâdyly warâ.

<sup>19</sup>Âpemugumo ewy Jesus eynynâ iozeno lelâ aniempyra-ro watay, inepa kehoem xurutaungâ, koendâ lelâ nheinwântondoem. <sup>20</sup>Xirâ enanâguewâdaungâ. Mâkâ iozeno einwântânry koendâ lelâ Jesus nheinwântondoem amânhenonlylymo watay, âsemagueze mâkâ. Inakanhe aitobyry modo Deus xygakeze. Igueduo, Deus agâpa nitaymba ise.

Tiago